



Iob affligé en toute extremité, a recours à son Dieu, & prend patience.

L'HISTOIRE de Iob est fort recommandable à la posterité, tant pour l'intégrité de sa vie, que pour estre l'exemple de patience à toute personne affligée. Ce bon personnage habitoit en la terre de Hus, homme craignant Dieu, & abhorrant le mal. Il eut dix enfans, sept fils & trois filles. Son bien consistoit en sept mil ouailles, trois mil chameaux, cinq cens couples de bœufs, & cinq cens asnes; & quant au reste de sa famille, elle surpassoit toutes les autres d'Orient. Or ses fils faisoient banquets tour à tour les vns aux autres, où se trouuoient pareillement leurs sœurs, qui fut occasion que Iob craignant qu'ils n'eussent méfait enuers Dieu, presentoit holocauste pour eux. Sur ce aduint par la volonté du Seigneur, que la maison où estoient ses enfans en plein festin, fut ruinée d'un horrible tempeste, & eux ensemble accablez. Aussi furent ses ouailles, bœufs, chameaux & asnes ravis par les larrons Chaldéens: & n'estoient presque les nouvelles d'une mesaventure apportées, qu'il en arriuoit d'autres pires d'un autre endroit: En quoy apparut vne merueilleuse constance de cét homme de bien, car ne s'estonnant, il dit seulement; Dieu l'a donné, Dieu l'a osté, son nom soit benit. Outre ce, il fut tellement vlcéré en son corps, que c'estoit pitié de le voir ainsi pauvement accoustré, & sur vn fumier, n'ayant pour tout qu'un test de pot pour se gratter: Lequel estant visité de trois de ses parens, comme aussi de sa femme, au lieu de consolation n'en receut que moquerie. Ce que toutesfois il porta patiemment, discourant en soy-mesme, & déduisant les miseres auxquelles l'homme est sujet. Finalement Dieu luy renuoya sa santé, & multiplia ses biens & richesses, & luy donna d'autres enfans, le comblant de plusieurs benedictions.

Iob 1. & 2. Chap. & suivans.